

Ma pâraisse

par Amelia Perchard

Ch'est St Martîn qu'est ma pâraisse,
Ou'est qu'mes anchêtres pour bein longtemps,
Ont vêtchu tous dé péthe en fis,
La vie paisibl'ye dés bouans vièrs temps!

Sa côte si belle est l'envie d'tous,
Dé Gouâré, jusqu'au fond d'Rozé,
Lé bieu briselames dé Ste Cath'rinne,
La pointe d'la Crête, la Baie d'Flitché!

Ses miles dé ruettes, bordées d'fossés,
D'bieaux bouais, et d'muthâles dé granni,
Qué nou trouve partout la pâraisse,
Donnent à tout l'monde divers pliaîsi!

Lé vièr châté si ordgilleux,
Comme j'savons, car san nom nos l'dit.
Monté en garde comme dé tout temps,
Si formidabl'ye sus san rotchi!

L'églyise avec san haut cliochi,
Toutes ses f'nêtres dé verre couleuthé.
Ou'est qu'nou trouve la fouai et la paix,
Dans s'n înmense trantchillité!

Y'a eune municipalité
Qui n'aime pon vaie trop dé changements;
Et tâche dé garder not' pâraisse,
Eune pliâche speciale pour nos d'scendants!



**Saint
Martîn**

Go to the Learn Jèrriais website to find the audio version of this...

www.learnjerriais.org.je

